



**Sabtu, 03 Oktober 2020**  
**Ogen: Jeremia 33:1-9**



**Kubereken Mulihi Kejuah-Juahan**



**K**alak si erkandu kandu biasana terbuka, ia nuri-nuri man temanna subuk kerna sura-surana entah pe kerna perbebenna. La lit rahasia saphi-saphi ia. Bageme teridah Dibata erkandu-kandu ras Jeremia. I bas penjara pe Jeremia idahi Tuhan. I je ituriken Tuhan ateNa sura-suraNa man Jeremia, si lenga iantusi Jeremia. La ipediat Tuhan Jeremia erperang ngelawan kalak Babilon, sebab enggo kin irencanakan Tuhan ngeruntuhkan kota Juda ras Jerusalem erkiteken kejahatan si ilakokenna. Tapi kenca runtuh kota e, itambari Tuhan mulihi rakyatNa, iberekenNa pagi mulihi kejuah-juahen eme dame ras ketenengen. I pasu-pasuna taneh ras pencarinna seh makmur me kerina rakyat Juda ras Jerusalem. I bahanna kota Jerusalem bali ras si nai, jaya, termurmur, ras mehaga. Rakyat e ialemina, ibersihkenNa i bas dosa-dosana nari. Jerusalem jadi ulu keriahen, kehamaten ras kemegahen man Dibata.

Bageme ituriken Dibata isi pusuhna man Jermia, kerna sura-surana si mbelin nandangi bangsaNa. I bas penuri-nuriNa e dungna tangkas man Jermia kerna sura-suraNa. Janah e ka si man pesehenna man bangsa Israel gelah tetap erpengerapen.

Tuhu adi kita erkandu-kandu ras Tuhan, sieteh nge dungna isi pusuh Dibata e, sebab nggit nge ia nuri-nuri man banta erkelangken Pustaka Si Badia. Dungna si eteh me maka isi pusuh Dibata e belinen kelenga ate asangken ukumen.

I bas masa pandemi enda sipebue ngerana-ngerana ras Dibata, si bahan IA kandu-kanduta. Teklah kita, kenca perbeben e icidahkenNa tetap keleng ateNa. IbereNa mulihi kejuah-juahen man banta ras isi jabunta guna ngenanami kiniulin sienggo isikapkenNa man banta sue ras si ipadankenNa man bangsaNa.

